

四庫全書

集部

欽定四庫全書

御選歷代詩餘卷九十二目錄

一百十六字

摸魚兒

又一體

晁補之

辛棄疾

三首

劉克莊

杜旗

張炎

施芸隱

何夢桂

莫崙

唐珏

李俊民

張翥

劉基

楊基

瞿佑
十首

前調
又一體

李昂英
二首

馮取洽

張龍榮

何夢桂
二首

燕公楠

楊果

李治

李天驥

許有士

張翥

二首

劉基

林鴻

吳易

前調

又一體

元好問

白樸

盧摯

御選歷代詩餘卷九十二目錄

欽定四庫全書

御選歷代詩餘卷九十二

一百一十六字

司經局洗馬掌局事兼翰林院修撰加二級臣王奕清奉

旨校刊

摸魚兒

又一體雙調一百十六字一名安慶摸一名買陂塘一名波塘柳此體為此調正格填詞家多用之

摸魚兒

東皋寓居

晁補之

買陂塘旋栽楊柳依稀淮汭湘浦東皋雨足新痕漲沙

鶯鶯來鷗聚堪愛處最好是一川夜月光流渚無人獨
舞任翠幄張天柔茵藉地酒盡未能去 青綾被莫憶
金閨故步儒冠曾把身誤弓刀千騎成何事荒了邵平
瓜圃君試覩滿青鏡星星鬢影今如許功名浪語便得
似班超封侯萬里歸計恐遲暮

前調

辛棄疾

更能消幾番風雨匆匆春又歸去惜春長怕花開早何
況落紅無數春且住見說道天涯芳草無歸路怨春不

語算只有殷勤畫簷蜘蛛網盡日惹飛絮長門事準擬
佳期又誤蛾眉曾有人妒千金縱買相如賦脈脈此情
誰訴君莫舞君不見玉環飛燕皆塵土閒愁最苦休去
倚危欄斜陽正在煙柳斷腸處

前調

觀潮

辛棄疾

望飛來半空鷗鷺須臾動地鼙鼓截江組練驅山去鏖
戰未收貔虎朝又暮悄慣得吳兒不怕蛟龍怒風波平
步看紅旆驚飛跳魚直上蹙蹋浪花舞憑誰問萬里

長鯨吞吐人間兒戲千弩滔天力倦知何事白馬素車
東去堪恨處人道是屬餽怨憤留千古功名自誤漫教
得陶朱五湖西子一舸弄煙雨

前調

雨巖怪石
名曰山鬼

辛棄疾

問何年此山來此西風落日無語看君似是羲皇上直
作太虛名汝溪上住算只有紅塵不到今猶古一杯誰
舉笑我醉呼君崔嵬未起山鳥覆杯去須記取昨夜
龍湫風雨門前石浪掀舞四更山鬼吹燈嘯驚倒世間

兒女依然處還問我清遊杖屨公良苦神交心許待萬里攜君鞭笞鸞鳳送我遠遊賦

前調

劉克莊

怪新來倚樓看鏡清狂渾不如舊暮雲千里傷心色那更亂蟬疎柳凝望久愴故國百年漢闕誰回首功名大謬歎采藥名山讀書精舍此計幾時就封侯事久矣輸人妙手扁舟聊作漁叟高冠長劍都閒物世上切身惟酒千載後君試看拔山扛鼎俱烏有英雄骨朽問顧

曲周郎而今還解來聽小詞否

前調

湖上

杜 旗

放扁舟萬山環處平鋪碧浪千頃仙人憐我征塵久借
與夢遊清枕風乍靜望兩岸羣峰倒浸玻瓈影樓臺相
映更日薄煙輕荷花似醉飛鳥墮寒鏡 中都內羅綺
十街萬井天教此地幽勝仇池仙伯今何在隄柳幾眠
還醒君試問看此意只今更有何人領功名未竟待學
取鸕夷仍攜西子來動五湖興

前調

登陸起潛
皆山樓

張炎

步高寒下觀浮遠清暉隔斷風雨醉魂誤入滁陽路落
莫不知何處闌屢拊又却是秋城自有芙蓉主重遊倦
旅對萬壑千巖長江巨浪空翠洒衣屨景如許都被
樓臺占取晴嵐暖靄朝暮乾坤靜裏閒居賦評泊水經
茶譜留勝侶更底用林泉曳杖尋桑苧休休訪古看排
闥青來書牀嘯詠莫向惠峰去

前調

瓊花

施芸隱

柳蒙茸暗凌波路煙飛慘澹平楚香車深駐猊環掩遙
認翠華雲母芳景暮鴛鴦悄銖衣來按飛瓊舞淒涼洛
浦漸玉漏沉沉清陰滿地乘月步虛去銷凝處誰說
三生小杜翔螭聲斷簫鼓情知禁苑酥塵浣羞與倡紅
同譜春幾度想依舊苔痕長印唐昌土風流千古人在
小紅樓朱簾半捲香注玉壺露

前調

何夢桂

把心期半生孤負玉堂元在何處朱絃彈絕無人聽空

操離鸞烈女遇不遇休更問悠悠世事都如許人生草
露看百歲歎名青銅鬢影撫劍淚如雨 知誰語落落
江空歲暮人間一夢今古雷塘十里斜陽外野草寒鴉
無數身世寓聊爾耳江山有恨誰堪賦冰心更苦都說
與梅花參橫月落一醉且歸去

前調

莫 崙

聽春教燕顰鶯訴朝朝花因風雨六橋忘却清明後碧
盡柳絲千縷蜂蝶侶正閒覓閒花閒草閒歌舞最憐西

子尚薄薄雲情盈盈波淚點點舊眷嫵
流紅記空汎
秋宮怨句才人何處嬌妒落紅無限隨風絮詩恨有誰
曾遇堪恨處恨二十四番花信催花去東君暗苦更多
囑多情多愁杜宇多訴斷腸語

前調

尊

唐 珣

漸滄浪凍痕銷盡瓊絲初漾明鏡鮫人夜翦龍髯滑織
就水晶簾冷鳬葉淨最好似嫩荷半捲浮晴影玉流翠
凝早枯豉融香紅鹽和雪醉齒嚼清瑩 功名夢曾被

秋風喚醒故人應動高興悠然世味渾如水千里舊懷
誰省空對景奈回首姑蘓臺畔愁波暝煙寒夜靜但只
有芳洲蘋花與老何日泛歸艇

前調

李俊民

這光景能銷幾度大都數十寒暑結廬人在山深處萬
壑千巖風雨朝復暮甚不管堂堂背我青春去高情自
許似野鶴孤雲江鷗遠水此興有誰阻功名事休歎
儒冠多誤韓顛彭蹶無數一溪隔斷桃源路只有人家

離黍歌且舞更不住醉中時出煙霞語暫來樵斧貪看
雨爭碁人間不道俯仰成今古

前調

春遊連日病
酒賦此止之

張翥

過花朝澹煙輕雨東風還又春社客懷不斷還家夢只
泥酒杯陶寫孤館夜甚濃醉無人知道歸來也蘭燈半
地任賦就魚箋絃拋玉軫誰念倦司馬長安市幾度
攜尊命駕空驚遊興衰謝醉鄉天地無今古爭得一櫟
蒲漉春縱暇便不飲從教團雪揉花打觥籌已罷笑螺

羸螟蛉吾今真止為報獨醒者

前調

雨

劉基

灑軒牕數聲疎雨霎時驅退殘暑碧江風過龍鱗起天
際白雲如絮人老去但說道秋來先自傷心緒故鄉何
處望不見淵明菊荒三徑盡日漫凝佇新涼夜兔影
沉沉漢渚寥寥鴻鴈飛度莎鷄絡緯間相妒催得鬢絲
千縷芳草渡還又是蒼煙綠水連紅樹榮名幾許隨分
莫求多五湖有路波浪未應阻

前調

感秋

楊基

問黃花為誰開晚青青猶遠西園秋光又染芙蓉好那
更薄霜輕霧江遠處但望見寒煙衰草山無數凭闌不
語恨一點飛鴻數聲柔櫓都不帶愁去 當時夢空憶
邯鄲故步山陽笛裏曾賦黃金散盡英雄老莫倚善題
鸚鵡君看取且信手提攜如意尊前舞浮名浪許要插
柳當門種桃臨水歸老舊遊路

前調

蘇堤
春曉

瞿佑

望西湖柳煙花霧樓臺非遠非近蘓堤十里籠春曉山
色空濛難認風漸順忽聽得鳴榔驚起沙鷗陣瑤堦露
潤把綃幕微褰紗牕半起未審甚時分 凭闌處水影
初浮日暈遊船未許開盡賣花聲裏香塵起羅帳玉人
猶困君莫問君不見繁華易覺光陰迅先尋芳信怕綠
葉成陰紅英結子留作異時恨

前調

平湖
秋月

瞿佑

望西湖斷虹收雨長天秋水一色姮娥捧出黃金鏡照

我清尊瑶席風浪息想此際驪龍熟睡鮫人泣吹殘短
笛對香霧雲鬟清輝玉臂今夕是何夕 凭闌處聽盡
更籌漏刻人間此景難得滿身風露颼颼冷何用水晶
屏隔君莫惜君不見坡仙樂事俱塵迹扁舟二客向赤
壁重遊山高水落孤鶴夢中識

前調

斷橋
殘雪

瞿佑

望西湖玉花飄後嫩寒猶自凝沍瑶臺夢斷飛瓊老惆
悵今吾非故斜日暮試指點橋南橋北經行路佳期又

誤正環玦隨波淚鉛成水流入裏湖去 凭闌處十里
銀沙分布水泥深阻行步孤山欲訪梅花信除是扁舟
飛渡君莫訴君不見酒尊誰酹逋仙墓詩魂未遇但寂
寞黃昏月香水影吟盡斷腸句

前調

雷峯
夕照

瞿佑

望西湖雷峯夕照霞光雲彩紅粲相輪高聳猶難礙何
況鈴音低喚堪愛翫最好是前山紫翠峰腰斷平銜一
半似金鏡初分火珠將墜萬丈瑞光散 凭闌處催罷

舞羣歌伴游船競泊芳岸雕軒繡勒爭門入贏得六街
塵亂君莫歎君不見疎星澹月橫微漢敲碁待旦聽鯨
吼華鐘鼉鳴急鼓光景暗中換

前調

麴院
荷風

瞿佑

望西湖藕花風起紗牕午夢初覺吳娃小艇貪游戲衝
破浮萍一道閒自料多應是凌波競赴仙娥召輕搖桂
棹愛香袖翻空明妝映水齊唱採蓮調 凭闌處兩岸
波光相照樓臺簾影顛倒蜻蜓飛去鴛鴦散應有玉顏

歡笑君莫誚君不見流光過眼催年少新涼又到漸苦
入芳心絲纏香竅荷背雨聲鬧

前調

花港
觀魚

瞿佑

望西湖兩堤新漲粼粼綠痕微起水香波暖魚初上來
往岸屑沙背遊棹樣又驚散茫然一去何曾止春融十
里愛桃浪翻紅萍星散紫此樂可知矣 凭闌處閒把
金鈎垂水波心頻掣雙鯉纖絲暗逐長竿裊牽動一簾
紋綺君莫喜君不見區區名利皆香餌朝思暮已便紫

綬金章不如蓑笠長臥釣船裏

前調

南屏晚鐘

瞿佑

望西湖暮天雲斂夕陽冉冉西墜落霞孤鶩齊飛處認
得南屏古寺行樂地便一霎夜昏花暝松煙翠鐘聲三
四見竹院僧歸蘭舟人散寂寞鳳城閉 凭闌處望斷
朱樓十二有人獨自憔悴青禽不到紅娘去誰把錦書
重寄君莫睡君不見月華星彩尤增媚張燈就醉怎料
得明朝憂愁風雨日出更多事

前調

柳浪
聞鶯

瞿佑

望西湖六橋新柳曉煙籠絡不定迎風翠浪高低起天
賦水情雲性宜掩映都漲滿杏花深巷桃花徑青濃綠
淨看鷗鷺驚飛魚龍起舞畫楫去相並 凭闌處兩兩
金梭拋競絲蠻巧語如詠銀屏記豆紅牙按提起去年
遊興君莫聽君不見歌樓多少新翻令鳳笙同韻好留
取長條渭城朝雨重與故人贈

前調

三潭
印月

瞿佑

望西湖暮蟾初出金波十里如瀉就中勝景三潭好不
照綺羅遊冶誰與話問素娥廣寒獨宿何曾嫁纖雲怎
惹看笑弄蘭芳輕搖桂影拭目辨真假 凭闌處儘把
閒情陶寫冰輪容易西下舞衫蹋破歌裙褪喚起更將
泉灑君莫捨君不見世間誰是長年者今宵醉也任顛
倒綸巾淋漓宮錦休放碧瑤竿

前調

兩峯
插雲

瞿佑

望西湖兩峯齊聳亭亭南北相對玉山高並三千丈俯

視渺茫塵界雲霞黠遮不盡七層牕戶雙飛蓋經時歷
代向僧定人歸鈴音自語也似說成敗 凭闌處幾度
清明陰晦山光依舊如黛白衣蒼狗多更變識破世間
情態君莫怪君不見英雄往日今何在羣仙久待便乘
此清風問之明月穩跨大鵬背

前調

又一體
子文知太平州

李昴英

怪朝來片紅初瘦半分春事風雨丹山碧水含離恨有
脚陽春難駐芳草波似叫住東君滿樹黃鸝語無端杜

宇報采石磯頭驚濤屋大寒色要春護 陽關唱盡鷓
鴒徘徊東渚相逢知又何處摩挲老劍雄心在對酒漫評
今古君此去幾千里東南隻手擎天柱長生壽母更穩
步安輿三槐堂上好看綵衣舞

前調

李昉英

曉風吹繡簾低舞霜霏香碎紅雨燕忙鶯懶春無賴肯
為好花遮護渾不顧費多少工夫做得芳菲聚休顰百
五却自恨新年游疎醉少光景恁虛度 猊煙瘦困起

庭陰正午游絲飛絮無據千林濕翠須臾徧難綠鬢根
霜縷愁絕處怎忍聽聲聲杜宇深深樹憑君寄語道去
也還來後期長在紫陌歲相遇

前調

和玉林遺蛻
山觀桃花

馮取洽

歎劉郎那回輕別霏霏三落紅雨玄都觀裏應遺恨一
抹澹煙殘縷愁望處想霧暗雲深忘却來時路新花舊
主記刻羽流商裁紅翦翠山徑日將暮空枝上時有
幽禽對語聲聲如問來否人生行樂須閒健衰老念誰

免此吾所與在溪上深深錦繡花千塢何時定去但對
酒思君呼兒為我頻唱小桃句

前調

張龍榮

又風塵暗斑吟袖西湖深處能浣晴雲片片平波影飛
趁棹歌聲遠回首喚髣髴記春風共載斜陽岸輕攜分
短悵柳密藏橋煙濃斷逕隔水語音換思量徧前度
高陽酒伴離蹤悲事何限雙峰塔露書空頽情共暮鴉
盤轉歸思嬾悄不似留眠水國蓮花畔燈簾暈滿正蟲

帙重繙沉煤半冷風雨閉宵館

前調

何夢桂

記年時人人何處長亭曾共尊酒酒闌歸去行人遠折
不盡長亭柳漸白首待把酒送君恰又清明後青條似
舊問江北江南離愁如我還更有人否 留不住強把
蔬盤淪韭行舟又報潮候風急岸花飛盡也一曲啼紅
滿袖春波皺青草外人間此恨年年有留連握手數人
世相逢百年歡笑能得幾回又

前調

用前韻

何夢桂

把人間古今勛業一時都付杯酒青山行徧人華髮老
盡門前青柳試回首記曉雨征衫又過年時後相逢故
舊說亭北樓南看花縱好能似少年否還自笑應是
山林厭韭忘却兒童迎候興來漫學長沙舞要舞更無
長袖看休皺歡笑外風濤世上時時有共君握手且盡
日尊前相揅一醉醉後明朝又

前調

答程雪樓見壽

燕公楠

又浮生平頭六十登樓悵望荆楚出山小草成何事間
却竹煙松雨空自許早搖落江潭一似琅琊樹蒼蒼天
路漫伏檻心長銜圖志短歲晏欲誰與 梅花賦飛墮
高寒玉宇鐵腸還解情語英雄操與君侯耳過眼羣兒
誰數霜鬚縷祇夢聽樓頭翡翠催歸去清觴飛羽且細
酌盱泉酣歌郢雪風致美無度

前調

同遺山
賦鴈丘

楊果

悵年年鴈飛汾水秋風依舊蘭渚網羅驚破雙棲夢孤

影亂翻波素還碎羽算古往今來只有相思苦朝朝暮
暮想塞北風沙江南煙月爭忍自來去埋恨處依約
井門舊路一丘寂寞寒雨世間多少風流事天也有心
相妒休說與還却怕有情多被無情誤一杯會舉待細
讀悲歌滿傾清淚為爾酹黃土

前調

和遺山
鴈丘

李治

鴈雙雙正分汾水回頭生死殊路天長地久相思債何
似眼前俱去推勁羽儻萬一幽冥却有重逢處詩翁感

遇把江北江南風嘹月唳并付一丘土 仍為汝小草
幽蘭麗句聲聲字字酸楚拍江秋影今何在宰木欲迷
堤樹霜魂苦算猶勝王塲青塚真娘墓憑誰說與對烏
道長空龍艘古渡馬耳淚如雨

前調

燈花

李天驥

又何須向明還滅寒花點綴孤影玉龍度海吹魚浪煙
澹寶釵橫鬢斜又整是蟲滴驪珠兩兩相交頸夜長人
靜恁玉果低拋金錢暗卜此意有誰領 歡娛事料想

憑伊先應把綃新淚猶凝銀篦未忍輕挑去只恐暗風
吹盡重記省怕莫是明朝有箇青鸞信怎知無定算只
解窺人人孤影隻成瘦又成病

前調

和明
初韻

許有壬

買陂塘旋栽楊柳歸來此是先務他鄉故里都休較舊
雨不如今雨鴻在渚笑爾尚南飛吾已安孤嶼黃花解
語道人老宜秋身安耐酒此正有真趣 鑾坡路大手
深慚燕許超騰又被鍾呂但求閒澹如元亮不恨詩無

奇句傾綠醕底須按樂天池上霓裳譜休論往古有三
日重陽約君同醉老子築西園

前調

春日西湖汎舟

張翥

漲西湖半篙新雨麴塵波外風軟蘭舟同上鴛鴦浦天
氣嫩寒輕暖簾半捲看一縷歌雲不礙桃花扇鶯嬌燕
婉任狂客無腸王孫有恨莫放酒杯淺垂楊岸何處
紅亭翠館如今遊興全嬾山容水態依然好惟有綺羅
雲散君不見歌舞地青蕪滿目成秋苑斜陽又晚正落

絮飛花將春欲去目送水天遠

前調

元夕贈楚芳吳蘭

張翥

記蘇臺舊時風景西樓燈火如畫嚴城月色依然好無
復綺羅遊冶歡意謝向客裏相逢還有詩陶寫金尊翠
斚把錦字新聲紅牙小拍分付倦司馬繁華夢喚起
燕嬌鶯婉肯教辜負元夜楚芳玉潤吳蘭媚一曲夕陽
西下沉醉罷君試看人生誰是無情者先生歸也但留
意江南杏花春雨和淚在羅帕

前調

金陵
秋夜

劉基

正淒涼月明孤館那堪征鴈嘹唳不知衰鬢能多少還
共柳絲同毳朱戶閉有瑟瑟蕭蕭落葉鳴莎砌斷魂不
繫又何必殷勤啼螫絡緯相伴夜迢遞樵漁事天地
和人較計虛名枉誤身世流年衮衮長江逝回首碧雲
無際空引睇但滿眼芙蓉黃菊傷心麗風吹露洗寂寞
舊南朝凭闌懷古零淚在衣袂

前調

寄紅
橋

林鴻

記紅橋少年遊冶多少雨情雲緒金鞍幾度歸來晚香
靨笑迎朱戶斷腸處是半醉微醒燈暗夜深語問情幾
許情應似吳蠶纏絲吞繭撩亂絲千縷別離路澹月
乳鴉啼曙淚痕紅袖沾污深懷遙想何年了空寄錦囊
佳句春欲去恨不得長繩繫日留春住相思最苦莫道
不消魂衷腸鐵石涕淚也如雨

前調

浙江潮

吳易

問天吳鞭江馬驅潮為誰簸弄如許一絲練影搖天末瞬

息魚龍嘯舞流傳誤道白馬素車果否英雄怒訇訇雷
鼓看貝闕翻鯨鼇山蹴雪瑤島飛仙墮傷心事不阻
投鞭飛渡鷗夷巨手何處霸圖牛斗曾雄踞氣壓迴瀾
萬弩今又古只恐怕蓬萊清淺迷歸路歸時記取有精
衛心癡麻姑眼老盼望久延佇

前調

又一體
並蒂蓮

元好問

問蓮根有絲多少蓮心知為誰苦雙花脈脈嬌相向只
在舊家兒女天已許甚不教白頭生死鴛鴦浦夕陽無

語算謝客煙中湘妃江上未是斷腸處 香奩夢好在
靈芝瑞露中間俯仰今古海枯石爛情緣在幽恨不埋
黃土相思樹流年度無端又被西風誤蘭舟少住怕載
酒重來紅衣半落狼藉卧風雨

前調

七夕用嚴
柔濟韻

白樸

問雙星有情幾許消磨不盡今古年年此夕風流會香
暖月牕雲戶聽笑語知幾處綵樓瓜果祈牛女蜘蛛暗
度似拋擲金梭縈回錦字織就舊時句 愁雲暮漠漠

蒼煙桂樹人間心更誰訴
擘釵分鈿蓬山遠一樣絳河
銀浦烏鵲渡離別苦啼妝
洒盡新秋雨雲軒且駐算猶
勝嫦娥倉皇奔月只有去時路


前調

題雪樓先生
歲寒亭詩卷

盧摯

為君歌歲寒亭子無煩洲畔鸚鵡
江山勝槩風霜地要
近魯東家住丘壑趣應素愛昂霄老柏孤松
樹登高作
賦想白雪陽春碧雲日暮別有倚樓處
金閨彥尚憶
西清接武年來喬木如許團茅時復義皇上我醉欲眠

卿去歌欲舉還自悟君家琢就瓊瑤句疎齋試與倩倚
竹佳人湘絃赴節涼滿北牕雨



御選歷代詩餘卷九十二

欽定四庫全書

集部

御選歷代詩餘卷九十三

詳校官中書_臣潘有為

侍讀_臣孫球覆勘

總校官進士_臣朱鈐

校對官中書_臣徐秉敬

謄錄監生_臣崔鶴立

欽定四庫全書

御選歷代詩餘卷九十三目錄

一百十六字

摸魚兒

又一體

程垓

黃機

盧祖皋

張榘

五首

黃昇

陳允平

李演

王沂孫

張炎

四首

歐良

陳策

林正大

李彭老

王易簡

二首

葛長庚

程鉅夫

二首

韋居安

王學文

李裕翁

周伯陽

許有孚

馬熙

許楨

張翥

四首

邵亨貞

二首

前調

又一體

張翥

李治

姚雲文

劉克莊

二首

李昴英

前調

又一體

元好問

白樸

三首

前調

又一體

蔣捷

御選歷代詩餘卷九十三目錄

欽定四庫全書

御選歷代詩餘卷九十三

一百一十六字

司經局洗馬掌局事兼翰林院修撰加二級臣王奕清奉

旨校刊

摸魚兒

又一體雙調

一百一十六字

摸魚兒

程垓

掩淒涼黃昏庭院角聲何處鳴咽矮牕曲屋風燈冷還

是苦寒時節凝竚切念翠被熏籠夜夜成虛設倚闌愁
絕聽鳳竹聲中犀幃影外簌簌釀輕雪傷心處却憶
當年輕別梅花滿院初發吹香弄蕊無人見惟有暮雲
千疊情未徹又誰料而今好夢分吳越不堪重說但記
得當初重門鎖處猶有夜深月

前調

黃機

惜春歸送春惟有亂紅撲簌如雨亂紅也怨春狼藉揜
得淚痕無數腸斷處更喚起羣鴉催發長亭路征鞍難

駐但脈脈含顰嗔人底事剛愛逐春去
闌干凭芳草
斜陽凝竚愁連滿眼煙樹髣髴不理金釵溜鸞鏡一匳
香霧花誰主悵玉容寂寞試問春知否單衣嬾御任門
外東風流鶯聲裏盡日攪飛絮

前調

九日登
姑蘓臺

盧祖皋

怪西風曉來敲帽年華還是重九天機袞袞山新瘦客
子情懷誰剖微雨後更鴈帶邊寒裊裊欺羅袖慵荷倦
柳梢不似黃花田田照眼風味儘如舊
登臨地寂寞

崇臺最久闌干幾度搔首翻雲覆雨無窮事流水斜陽
知否吟未就但衰草寒煙商略愁時候閒愁浪有總輸
與淵明東籬醉舞身世付杯酒

前調

茶蘼

張 槩

正萼牆柳絲低度枝頭紅紫飛盡穠陰漲綠冰鈿碎浥
泥麝蘭成陣仙骨嫩恍姑射瑤姬青幃游瑣苑風前有
恨也一似宮梅飄香墜粉輕點壽陽鬢 梨花雪誰道
全無清韻何曾留到春晚柔條不受真珠露滴瀝紫檀

心暈莫更問待按放金尊揅作通宵飲日高慵困任翠
幄低雲玉薰泛夢路入醉鄉穩

前調

送邵瓜坡
赴舍山尉

張槩

正挑燈共聽簷雨問誰催動行色風前千點離亭恨惟
有落梅知得王謝宅記前度斜陽燕子曾相識花香霧
鳥無計強追隨陽關聲斷回首暮雲隔文章貫合上
薇垣梧掖征鞍底事江北青衫莫對韓彭著還是玉麟
佳客須記憶有衿佩鏘鏘正願依重席荼蘼未拆次第

牡丹開一尊留待相與醉寒食

前調

張槊

望闕河目斷煙草青天長劍頻倚香街十里珠簾月空
想當年華麗堪歎處但沙靄蒹葭啣鴈聲起平山漫
記悵楊柳春風晴空欄檻陳迹總非是重陽好紅葉
黃華滿地良辰美景如此青油幕府傳芳華冉冉露瓊
花氣還更喜看玉閭規恢笑騁伊吾志塵清北冀向關
洛聯鑣巍巍冠佩麟閣畫圖裏

前調

張 槩

猛思量嬾窩初度魯雲呈瑞時節平山楊柳蒼茫外猶
是鄉關明月春漏洩定知有梅花先向江南發煙波夢
濶漫約住西風呼將寒鴈把酒為君說 君看取世道
羊腸屈摺依然熟路輕轍林泉暫洗經綸手桐栢夜香
熏徹趨魏闕指天上星辰平步儀清切蟠桃未結待做
著功名却尋曼倩相與帶花折

前調

張 槩

正桃花漸飛紅雨依稀一半春色東風十里離亭恨楊
柳絲絲如織還又憶向雪月梅邊陶寫吟情逸清愁拍
拍算祇暮山知棲鴉斜照春樹渺空碧 文章貫合整
垂雲健翼翔鸞底用棲棘要尋玉洞煙霞勝聊趁麟符
蜚檄歸驄急看塵袂方清有恩綸催入覲仙倦舄相與
問孤山開尊抵掌一舸畫橋側

前調

遺蛻山觀
桃花作

黃昇

問山中小桃開後曾經多少晴雨遙知載酒花邊去唱

我舊歌金縷行樂處正蝶繞蜂圍錦繡迷無路風光有
主想倚杖西阡停杯北望望斷碧雲暮花知道應倩
飛鴻寄語年來老子安否一春一到成虛約不道樹猶
如此煩說與但歲歲東風輕點紅雲塢劉郎老去待有
日重來同君一笑拈起看花句

前調

西湖
送春

陳允平

倚東風畫闌十二芳陰簾幙低護玉屏翠冷梨花瘦寂
寞小樓煙雨腸斷處悵折柳柔情舊別長亭路年華似

羽任錦瑟聲寒瓊簫夢遠羞對綵鸞舞
文園賦重憶
河橋看嫵啼痕猶濺紈素丁香共結相思恨空托繡羅
金縷春已暮縱燕約鶯盟無計留春住傷春倦旅趁暗
綠稀紅扁舟短棹載酒送春去

前調

太湖

李演

又西風四橋疎柳驚蟬相對秋語瓊荷萬笠花雲重
嫵紅衣如舞鴻北去渺岸芷汀芳幾點斜陽雨吳亭舊
樹又繫我扁舟漁鄉釣里秋色澹歸鷺長干路蔓草

疎煙斷墅商歌如寫羈旅丹溪翠岫登臨事苔屐尚黏
蒼土鷗且住怕月冷吟魂婉冉空江暮明燈暗浦更短
笛銜風長雲弄晚天際畫秋句

前調

尊

王沂孫

玉匳寒翠絲微斷浮空清影零碎碧芽也抱春洲怨雙
捲小絨芳字還又似繫羅帶相思幾點青鈿綴吳中舊
事悵酪乳爭奇鱸魚漫好誰與共秋醉 江湖興昨夜
西風又起年年輕誤歸計如今不怕歸無準却怕故人

千里何況是正落月垂虹怎賦登臨意滄浪夢裏縱一
舸重遊孤懷暗老餘恨渺煙水

前調

高愛山
隱居

張炎

愛吾廬傍湖千頃蒼茫一片清潤晴嵐暖翠融融處花
影倒窺天鏡沙浦迴看野水涵波隔柳橫孤艇眠鷗未
醒甚占得蓴鄉都無人見斜照起春暝還重省豈料
山中秦晉桃源今度難認林間即是長生路一笑元非
捷徑深更靜待散髮吹簫跨鶴天風冷憑高露飲正碧

落塵空光搖半壁月在萬松頂

前調

寓澄江喜
魏叔泉至

張炎

想西湖斷橋疎樹梅花多是風雨如今見說閒雲散煙
水少逢鷗鷺歸未許又款竹誰家遠思愁徐庾重游倦
旅縱認得鄉山長江滾滾隔浦正延佇垂楊渡握手
荒城舊侶不知來自何處春牕翦韭青燈夜疑與夢中
相語欄屢拊甚轉眼流光短髮眞堪數從教醉舞試借
地看花揮毫賦雪孤艇且休去

前調

別陸處梅

張炎

向天涯水流雲散依依往事非舊西湖見說鷗飛去知
有海翁來否風雨後甚客裏逢春尚記花間酒空嗟皓
首對茂苑殘紅攜歌占地相趁小垂手 歸時候花徑
青紅尚有好游何事詩瘦龜蒙未肯尋幽興曾戀志和
漁叟吟嘯久愛如此清奇歲晚忘年友呼船渡口欲西
出陽關故人何處愁在渭城柳

前調

春雪客中寄友

張炎

又孤吟灞橋深雪千山絕盡飛鳥梅花也著東風笑一
夜瘦添多少春悄悄正斷夢愁詩忘却池塘草前邨路
杳看野水流冰舟閒渡口何必見安道 慵登眺脈脈
霏霏才了寒威猶自清峭終須幾日開晴去無奈此時
懷抱空懊惱料酒興歌情未肯隨人老惜花起早撩醉
裏忘歸接羅更好一笑任傾倒

前調

和李玉田韻

歐良

喜西風朝來如約新涼一雨初霽家山望斷知何處渺

渺長天秋水空眼底歎鴈杳魚沉尺紙無人寄芸牕草
砌漸影顫疎桐聲敲落葉孤枕怎成睡逢塲戲遮莫
怨秋憔悴今朝有酒須醉尊前待喚佳人道為雪藕絲
輕脆閒省記便笑口頻開一歲知能幾歸期尚未且蠟
屐蘭橈湖山深處同賞月中桂

前調

仲宣樓賦

陳策

倚危梯酌春懷古輕寒纔轉花信江城望極多愁思前
事惱人方寸湖海興算合付元龍舉白澆談吻憑高試

問問舊日王郎依劉有地何事賦幽憤 沙頭路休記
家山遠近賓鴻一去無信滄波渺渺空歸夢門外北風
淒緊烏帽整便做得功名奈綠星星鬢敲吟未穩又白
鷺飛來垂楊自舞誰與寄離恨

前調

括葉清臣松
江秋泛賦

林正大

泛松江水遙山碧清寒微動秋浦霜空霽色橫無際別
鵲驚鴻無數朝又暮聽牧笛長吹隱隱漁榔度騷人才
子漫覽物興懷浮游塵外嘯傲劇清思 人間世擾擾

榮途要路瀛洲瓊館安所軒裳何似漁蓑興蕭散龍游
鶴翥須歸去辦雙槳孤帆雲月和煙雨江湖伴侶趁社
橘初黃汀葭餘翠成我尊鱸趣

前調

專

李彭老

過垂虹四橋飛雨沙痕初漲春水腥波十里吳歛遠綠
蔓半縈船尾連復碎愛滑卷青綃香裊冰絲細山人雋
味笑杜老無情香羹碧澗空祇賦芹美 歸期早誰似
季鷹高致鱸魚相伴菰米紅塵如海丘園夢一葉又秋

風起湘湖外看采蘋芳條際曉隨魚市舊遊漫記但望
極江南秦鬟賀鏡渺渺隔煙翠

前調

尊二首

王易簡

怪鮫宮水晶簾捲冰痕初斷香縷柔波蕩槩人難到三
十六陂煙雨春又去伴點點荷錢隱約吳中路相思日
暮恨洛浦娉婷芳鈿翠翦匳影照淒楚功名夢消得

西風一度高人今在何許鱸香菰冷斜陽裏多少天涯
意緒誰記取但枯豉紅鹽溜玉凝秋筋尊前起舞算惟

有淵明黃花歲晚此興共千古

前調

王易簡

過湘皋碧龍驚起冰涎猶護髣影春洲未有菱歌伴獨
占暮煙十頃呼短艇試翦取纖條玉溜青絲瑩尊前細
認似水面新荷波心半卷點點翠鈿淨淒涼味酪乳
那堪比並吳鹽一箸秋冷當時不為鱸魚去聊爾動渠
歸興還記省是幾度西風幾處吹愁醒鷗昏鷺暝漫換
得霜痕蕭蕭兩鬢羞與共秋鏡

前調

葛長庚

問滄江舊盟鷗鷺年來景物誰主悠悠客鬢知何似吹
滿西風塵土渾未悟漫自許功名談笑侯千戶春衫戲
舞怕三徑都荒一犁未把猿鶴笑君誤君且住未必
心期盡負江山秋事如許月明風靜萍花路路敲枕試聽
鳴櫓還又去道喚取陶泓要草歸來賦相思最苦是野
水連天漁榔四起蓑笠占煙雨

前調

壽燕五
峯右丞

程鉅夫

記江梅向來輕別相逢今又平楚東風小試南枝暖早已秋千煙雨春幾許向五老仙家移下瓊瑤樹溪橋驛路更月曉堤沙霜秋野水疎影自容與平生事幾度含章殿宇隔花么鳳能語苔枝天嬌蒼龍瘦誰把冰鬚細數千萬縷簇一點芳心待與和羹去移宮換羽且度曲傳觴主人花下今日慶初度

前調

次盧疎齋題歲寒亭

程鉅夫

問疎齋湘中朱鳳何如江上鸚鵡波寒木落人千里客

裏與誰同住茅屋趣吾自愛吾亭更愛參天樹勞君爲
賦渺雪鴈南飛雲濤東下歲晏欲何處疎齋老意氣
經文緯武平生握手相許江南江北尋芳路共看碧雲
來去黃鵠舉記我渡秦淮君正臨清句歌聲緩與怕逕
竹能醒庭花起舞驚散夜來雨

前調

常居安

繞苔城水平波渺雙湖遙睇無際就中惟有魚灣好占
得西關佳致楊柳外羨汎宅浮家當日玄真子溪山信

美歎陳迹猶存前賢已往誰會景中意
蕭閒甚築屋三間近水汀洲香汎蘭芷清風明月知多少肯滯軟紅
塵裏垂釣餌趁春水生時賸有桃花鯁煩襟淨洗待辦
取輕蓑來分半席相對弄清泚

前調

送汪水雲之湘

王學文

記當年舞衫零亂淋鈴忍按新闌杜鵑枝上東風晚點
點淚痕凝血芳信歇念初試琵琶誰識關山月悲絃易
絕奈笑罷顰生曲終愁在誰解寸腸結
浮雲事又作

南柯夢徹一簪聊寄華髮乾坤桑海無窮事才歷昆明
初劫誰共說都付與焦桐寫入梅花疊黃花送別休更
問湘魂獨醒何在沉醉浩歌發

前調

李裕翁

訝江南許多風景繁華只在晴晝些兒澹沲冲融意到
處拈花著柳疎雨後更豔豔絲絲潑眼濃如酒飛浮宇
宙但借日浮香隨風著物巧筆畫難就惆悵處曾記
蘓堤攜手十年驚覺回首蒼埃霽景成陰晦湖水湖煙

依舊凝望久問燕燕鶯鶯識此年華否長門別有脈脈
斷腸人柔情蕩漾長是為伊瘦

前調

周伯陽

又匆匆月鞭露銍梅花江上歸路海圖破碎來時線何
似綵衣低舞風雪暮正望斷青山一髮雲橫處浩歌獨
舉便想見迎門牽衣兒女總是舊睂嫵陽關曲揮洒
紫薇花露妙音清遠高駐經寒楊柳休輕折搖動一溪
霜霧邯鄲步笑布韞青鞵去住知何許汀鷗沙鷺若問

我重來明年有約今日是前度

前調

許有孚

買陂塘旋栽楊柳不妨三月農務溪翁走報新痕漲昨夜西山雷雨將沒渚有複徑雙洲繚繞通孤嶼黃鸝對語正春色暄妍物華明媚好在浴沂趣天涯路芳草茫茫如許蠻牋難寫心呂碧雲冉冉春波綠都是相思情句花共醕似梅與山礬臭味曾同譜堤陰樹古要亂絮漫空柔條蘸水慎勿折樊圃

前調

和許可行韻

馬熙

買陂塘旋栽楊柳夢中還理家務十年不到衡山麓辜
負楚雲湘雨蘋映渚渺杜若江離香接煙霞嶼口心相
語為蠅驢東西雲龍上下誤却釣遊趣平生志欲識
平輿二許煌煌嶽降申呂菲詞聊為先生壽博得月章
星句毋我醕只小草幽蘭心醉離騷譜松存徑古待游
徧西園荷鋤歸去吾亦愛吾圃

前調

和可行叔韻

許楨

買陂塘旋栽楊柳求田專理農務扁舟來往煙波裏青
筠綠蓑風雨時泛渚把遠岫遙岑收拾來孤嶼霜花笑
語道鳳閣鸞臺黃塵烏帽爭似醉鄉趣 洹溪上道士
而今誰許非熊夢斷姜呂水聲山色相縈繞湧出筆端
新句斟桂醕聽萬籟笙竽一派仙家譜休論往古向種
菊籬邊觀魚軒外晚節有秋圃

前調

送黃任伯
歸豐城

張翥

正匆匆楚鄉秋晚孤鴻飛過南浦同來桃葉堪惆悵一

舸載春先去愁絕處問那曲闌干曾聽人低語今宵最
苦向楓樹溪橋蘆花野館翦燭臥聽雨 吳霜鬢破帽
西風怎護絲絲都是離緒舊愁頓冷新愁重總付墜鞭
詞譜君記取待雪夜相思乘興柴岡路唱予和汝要款
段隨車輕盈喚酒重為國香賦

前調

題熊伯宣藏
梅花卷子

張翥

記西湖水邊曾見楂枒老樹如此冰痕冷沁苔枝雪的
皚數花纔試天也似愛玉質清高不入閒紅紫孤山處

士縱賦得招魂煙荒雨暗寂寞香魂死
春風筆休憶
深宮舊事添人多恨多思墨池雪嶺三生夢喚起縞衣
仙子仍獨自向瘦影黃昏和月窺牕紙聲聲字字寫不
盡江南閒愁萬斛訴與綠衣使

前調

雙頭蓮為人折去

張翥

問西湖舊家兒女香魂還又連理多情欲賦雙蕖怨閒
却滿匳秋意嬌旖旎愛照影紅妝一樣新梳洗王孫正
擬喚翠袖輕歌玉箏低按涼夜為花醉
鴛鴦浦淒斷

凌波夢裏空憐心苦絲脆吳娃小艇應偷採一道綠萍
猶碎君試記還怕是西風吹作行雲起闌干漫倚便載
酒重來尋芳已晚餘恨渺煙水

前調

賦湘雲

張翥

問湘南有雲多少不應長是為雨平生宋玉緣情老羸
得鬢絲如許歌又舞更一曲琵琶昵昵如私語閒愁浪
苦怪舊日青衫空流淚滿不解畫眉嫵空凝佇十二
峰前路阻相逢知在何處今朝重見春風手仍聽舊彈

金縷君且住怕望斷蘅皋日暮傷離緒新聲自譜把江北江南今愁往恨盡入斷腸句

前調

吳門九日次
魏彥文韻

邵亨貞

鴈來時晚寒初勁青燈搖動牕戶商聲暗起鄰牆樹觸
景亂愁還聚秋又暮奈合造淒涼無處無笳鼓狂吟醉
舞記滿帽簪花分籌藉草騎馬忘歸路懷人遠有恨
憑誰寄語虛名長是相誤天涯節序渾非舊留得滿城
風雨心萬縷漫自喜孤高不惹沾泥絮羈懷倦訴好分

付兒曹耘鉏三逕早晚賦歸去

前調

山中
九日

邵亨貞

記年時滿城風雨姑蘇臺下重九客樓已辦登臨屐曾
為好山回首延佇久望翠壁嶙峋間却題詩手相逢野
叟強笑折黃花亂簪烏帽來與共尊酒流光去肯爲
間人宿留驚心節序依舊西風只管吹蓬鬢病骨尚堪
馳驟官渡口便擬喚扁舟往問江潭柳明年健否縱世
故無情未應遲暮孤負此時候

前調

又一體

張翥

甚瑤臺翠鸞雛小風流占斷妍景數聲何處啼春勝簾
捲小牕人靜天氣困梳未穩綠鬟倭鬢臨妝鏡羞嫵倦
整待鉸箇金花看尖雙鴈還怯剪刀冷仙家好十二
行雲路迴牢籠芳夢不定多情正要人拘管無奈綠昏
紅暝乘酒興攜兩袖天風飛上蓬萊頂闌干獨凭為喚
玉笙來霓裳按舞和月醉花影

前調

並蒂蓮

李冶

為多情和天也老不應情遽如許請君試聽雙鶯怨方
見此情真處誰點注香湫湚銀塘對抹臉脂露藕絲幾
縷絆玉骨春心金沙曉淚漠漠瑞紅吐連理樹一樣
驪山懷古古今朝暮雲雨六郎夫婦三生夢幽恨從來
難阻須念取共鴛鴦翡翠照影長相聚秋風不住悵寂
寞芳魂輕煙北渚涼月又南浦

前調

艮岳

姚雲文

渺人間蓬瀛何許一朝飛入梁苑輞川梯洞層岨出猶

帶鬼愁龍怨窮遊宴談笑裏金風吹折桃花扇翠華天
遠悵莎沼螢黏錦屏煙合草露泣蒼蘚東華夢好在
牙檣瑣畫圖歷歷曾見落紅萬點孤臣淚斜日牛羊
春晚摩雙眼看塵世鰲宮又報鯨波淺吟鞭拍斷便乞
與媧皇化成精衛填不盡遺憾

前調

賞海棠

劉克莊

甚春來冷煙淒雨朝朝遲了芳信驀然作暖晴三日又
覺萬株嬌困天怎忍潘令老不成也沒看花分才情減

盡悵玉局飛仙石湖絕筆孤負這風韻
傾城色懊惱
佳人薄命牆頭岑寂誰問東風日暮無聊賴吹得胭脂
成粉君細認花共酒古來二事天猶吝年光去迅漫綠
葉成陰蒼苔滿地做取異時恨

前調

劉克莊

便披蓑荷鋤歸去何須身著宮錦與誰共話桑麻事朱
老阮生尤穩節樣餅甕樣繭長鬚赤脚供樵飪清流濁
品盡埽去胃中置諸膜外對酒莫辭飲
華胥夢怕煞

人驚曉枕疎牕惟月來闌一生常被弓旌誤且告朝家
追寢愁箇甚君管取有薇堪采松堪蔭茅山再任幸不
是謀臣又非世將免犯道家禁

前調

李昴英

敞茅堂茂林環翠苔磯低蘸煙浦青蓑混入漁家社斜
日斷橋船聚真樂處坐芳草瓦尊濁酒頻頻注皋禽自
舞慣松徑穿雲梅邨蹋雪朗笑自來去 乘車墜爭似
修筇穩步前塵回首俱誤安閒得在中年好抱甕尚堪

蔬圃高眼覷算不識人間寵辱除巢許風篁解語應共
笑羣狙無端喜怒三四計朝暮

前調

又一體
鴈丘

元好問

問世間情是何物直教生死相許天南地北雙飛客老
翅幾回寒暑歡樂趣離別苦就中更有癡兒女君應有
語渺萬里層雲千山暮雪隻影向誰去橫汾路寂寞
當年簫鼓荒煙依舊平楚招魂楚些何嗟及山鬼暗啼
風雨天也妒未信與鶯兒燕子俱黃土千秋萬古為留

待騷人狂歌痛飲來訪鴈丘處

前調

真定異塵堂
同諸公晚眺

白樸

敞青紅水邊牕外登臨元有佳趣薰風蕩漾昆明錦一
片藕花無數纔欲語香暗度紅塵不到蒼煙渚多情鷗
鷺儘翠蓋搖殘紅衣落盡相與伴風雨橫塘路好在
吳兒越女扁舟幾度來去採菱歌斷三湘遠寂寞岼花
汀樹天已暮更留看飄然月下凌波步風流自許待載
酒重來淋漓醉墨為寫洛神賦

前調

白樸

望參差冶城煙雨故人知在琳宇繡衣來就論文友隨
意割雞炊黍歡樂處忘爾汝清談況有神仙侶一杯緩
舉放遠目增明遙岑出翠俯仰幾今古紅塵夢不到
丹臺紫府尋真偶得佳趣兩株翠柏參天起千畝渭川
煙雨君已許向此地結亭為我開牕戶朝來暮去待細
攬煙霞平分風月揮灑錦囊句

前調

次前韻

白樸

聽西風細吟亭樹秋聲先到衡宇季鷹千里尊鱸興更
喜范張雞黍傾蓋處慚愧汝高樓不見煙霞侶飽尊笑
舉對得意江山忘懷風月醉眼翫今古 鑾坡客又向
紅蓮幕府田園何日成趣九重聞道思賢佐恐要濟時
霖雨天若許從所好結廬相就開蓬戶山人休去怕蕙
帳空懸猿驚鶴怨貽笑草堂句

前調

又一體
壽東軒

蔣捷

彈吟鞭鴈峰高處曾游長壽仙府年年長見瑤簪會霞

杪蓋芝輕度開繡戶芙蓉萬朶香紅牋染秋光素清簫
麗任濫玉杯深鸞酣鳳醉猶未洞天暮 塵緣誤迷却
桃源舊步飛瓊芳夢同賦朝來聞道仙童宴翹首翠房
玄圃雲又霧身恍到微茫認得胎禽舞遙汀近浦便一
葦漁航撐煙載雨歸去伴寒鷺

御選歷代詩餘卷九十三

欽定四庫全書

御選歷代詩餘卷九十四目錄

一百十六字

賀新郎

上

廖行之

李玉

葉夢得

辛棄疾

十六首

游次公

二首

京鏜

袁去華

劉克莊

八首

王邁

三首

于國寶

張鎡

劉擬

四首

程秘

王千秋

陳亮

劉過

六首

楊炎

張輯

黃機

二首

御選歷代詩餘卷九十四目錄

欽定四庫全書

御選歷代詩餘卷九十四

一百十六字

司經局洗馬掌局事兼翰林院修撰加二級臣王奕清奉

音校刊

賀新郎

上

雙調一百十六字即亦作涼一名金縷歌一名金縷衣一名乳燕飛一名風敲竹一名貂裘換酒皆同調異名也

賀新郎

賦木樨

廖行之

修月三千戶擁冰輪同遊碧落問津牛渚上界真仙多
才思巧與瑤階玉樹渺萬里人間何處雲葉依依分清
陰記當年掩映霓裳舞算萬木寧如許年年蕭爽幽
巖路倚西風吹香金粟超然雲塢一洗紛紛凡花盡堪
寫清商對撫為豁散蠻煙瘴雨脫俗高標誰能領向騷
人正欠題新句須大手與君賦

前調

李玉

篆縷消金鼎醉沉沉庭陰轉午畫堂人靜芳草王孫知

何處惟有楊花糝徑漸玉枕騰騰夢醒簾外殘紅春已
透鎮無聊滯酒厭厭病雲鬢亂未忺整江南舊事休
重省徧天涯尋消問息斷鴻難倩月滿西樓凭闌久依
舊歸期未定又只恐餅沉金井嘶騎不來銀燭暗枉教
人立盡梧桐影誰伴我對鸞鏡

前調

葉夢得

睡起流鶯語掩蒼苔房櫳向晚亂紅無數吹盡殘花無
人見惟有垂楊自舞漸暖靄初回輕暑寶扇重尋明月

影暗塵侵上有乘鸞女驚舊恨遽如許 江南夢斷橫
江渚浪黏天葡萄漲綠半空煙雨無限樓前滄波意誰
採蘋花寄取但悵望蘭舟容與萬里雲颿何時到送孤
鴻目斷千山阻誰為我唱金縷

前調

賦水仙

辛棄疾

雲臥衣裳冷看蕭然風前月下水邊幽影羅韞生塵凌
波去湯沐煙波萬頃愛一點嬌黃成暈不記相逢曾解
佩甚多情為我香成陣待和淚收殘粉 靈均千古懷

沙恨記當時匆匆忘把此仙題品煙雨淒迷傷愁損翠
袂搖搖誰整漫寫入瑤琴幽憤絃斷招魂無人賦但金
杯的皪銀臺潤愁殢酒又獨醒

前調

賦海棠

辛棄疾

著厭霓裳素淙臙脂苧蘿山下浣沙溪渡誰與流霞千
古醞引得東風相誤從史入吳宮深處鬢亂釵橫渾不
醒轉越江剡地迷歸路煙艇小五湖去當時倩得春
留住就錦屏一曲種種斷腸風度纔得清明三月近須

要詩人妙句笑援筆殷勤為賦十樣蠻牋紋錯綺粲珠
璣淵擲驚風雨重喚酒共花語

前調

賦滕王閣

辛棄疾

高閣臨江渚訪層城空餘舊跡黯然懷古畫棟珠簾當
日事不見朝雲暮雨但遺下西山南浦天宇俯睂浮新
綠映悠悠潭影痕如故空有恨奈何許 王郎健筆誇
翹楚到如今落霞孤鶩競傳佳句物換星移知幾度夢
想珠歌翠舞為徒倚闌干凝佇目斷平蕪滄波晚快江

風一瞬澄襟暑誰共飲有詩侶

前調

賦琵琶

辛棄疾

鳳尾龍香撥自開元霓裳曲罷幾番風月最苦潯陽江
頭客畫舸亭亭待發記出塞黃雲堆雪馬上離愁三萬
里望昭陽宮殿孤鴻沒絃解語恨難說 遼陽驛使音
塵絕瑣牕寒輕攏慢撚淚珠盈睫推手含情還却手一
抹梁州哀徹千古事雲飛煙滅賀老定場無消息想沉
香亭北繁華歇彈到此為嗚咽

前調

辛棄疾

柳暗凌波路送春歸猛風暴雨一番新綠千里瀟湘
葡萄漲入解扁舟欲去有檣燕留人相語艇子飛來生塵
步唾花寒唱我新翻句波似箭催鳴櫓黃陵祠下山
無數聽湘娥泠泠曲罷為誰情苦行到東吳春已暮江
闊潮平穩渡望金雀觚稜翔舞前度劉郎今重到問玄
都千樹花存否愁為倩么絃訴

前調

別陳同父
聞笛有感

辛棄疾

把酒長亭說看淵明風流酷似臥龍諸葛何處飛來林
間鵲蹙蹋松梢殘雪要破帽多添華髮剩水殘山無態
度被疎梅料理成風月兩三鴈也蕭瑟佳人重約還
輕別悵清江天寒不渡水深冰合路斷車輪生四角此
地行人銷骨問誰使君來愁絕鑄就而今相思錯料當
初費盡人間鐵長夜笛莫吹裂

前調

三山雨中有
懷趙丞相

辛棄疾

翠浪吞平野挽天河誰來照影臥龍山下煙雨偏宜晴

更好約略西施未嫁待細把江山圖畫千頃光中堆濫
瀕似扁舟欲下瞿塘馬中有句浩難寫詩人例入西
湖社記風流重來手種綠成陰也陌上遊人誇故國十
里水晶臺榭更複道橫空清夜粉黛中洲歌妙曲問當
年魚鳥無存者堂上燕又長夏

前調

辛棄疾

覓句如東野想錢塘風流處士水仙祠下更憶小孤煙
浪裏望斷彭郎欲嫁是一色空濛難畫誰解胸中吞雲

夢試呼來草賦看司馬須更把上林寫
鷄豚舊日漁樵社問先生帶湖春漲幾時歸也為愛瑠璣三萬頃正
臥水亭煙榭對玉塔澄瀾深夜鴈鷺如雲休報事被詩
逢敵手皆勦者春草夢也宜夏

前調

辛棄疾

碧海成桑野笑人間江翻平陸水雲高下自是三山顏
色好更看雨婚煙嫁料未必龍眠能畫擬向詩人求幼
婦倩諸君妙手皆談馬須進酒為陶寫
回頭鷗鷺瓢

泉社莫吟詩莫拋尊酒是吾盟也千騎而今遮白髮忘
却滄浪亭榭但記得灞陵呵夜我輩從來文字飲怕壯
懷激烈須歌者蟬噪也綠陰夏

前調

題傅君
用山園

辛棄疾

曾與東山約為儵魚從容分得清泉一勺堪笑高人讀
書處多少松牕竹閣甚長被遊人占却萬卷何言達時
用士方窮早與人同樂新種得幾花藥山頭怪石蹲
秋鷄俯人間塵埃野馬孤撐高攬拄杖危亭扶未到已

覺雲生兩脚更換却朝來毛髮此地千年曾物化莫呼
猿且自多招鶴吾亦有一丘壑

前調

題趙晉臣數
文積翠巖

辛棄疾

拄杖重來約到東風洞庭張樂滿空簫勺巨海拔犀頭
角出東向北山高閣尚依舊爭前又却老我傷懷登臨
際問何方可以平哀樂惟是酒萬金藥勸君且作橫
空鷲更休論人間腥腐紛紛烏攫九萬里風斯在下翻
覆雲頭雨脚快直上崑崙濯髮好臥長虹陂千里是誰

言聽取雙黃鶴攜翠影浸雲壑

前調

韓仲止判院
見訪用前韻

辛棄疾

聽我三章約有談功談名者舞談經深勺作賦相如親
滌器識字子雲投閣算枉把精神費却此會不如公榮
者莫呼來政爾妨人樂醫俗士苦無藥當年衆鳥看
孤鷄意飄然橫空直把曹吞劉攫老我山中誰是伴須
信窮愁有脚似翦盡還生僧髮自斷此生天休問情何
人說與乘軒鶴吾有志在丘壑

前調

獨坐停雲
有懷親友

辛棄疾

甚矣吾衰矣。恨平生、交遊零落，只今餘幾。白髮空垂三
千丈，一笑人間萬事。問何物能令公喜。我見青山多嫵
媚，料青山見我應如是。情與貌畧相似。一尊搔首東
牕裏。想淵明、停雲詩就，此時風味。江左沉酣求名者，豈
識濁醪妙理。回首叫雲飛。風起不恨古人吾不見。恨古
人不見吾狂耳。知我者二三子。

前調

題悠
然閣

辛棄疾

路入門前柳到君家悠然細說淵明重九晚歲淒其無
諸葛惟有黃花入手更風雨東籬依舊頻顧南山高如
許是先生拄杖歸來後山不記何年有 是中不減匡
廬秀倩西風為吾喚起翁能來否烏倦飛還平林去雲
自無心出岫賸準備新詩幾首欲辨忘言當年意慨遙
遙我去羲農久天下事可無酒

前調

用前韻
再賦

辛棄疾

肘後俄生柳歎人生不如意事十常八九右手淋浪才

有用閒却持螯左手漫贏得傷今感舊投閣先生惟寂寞笑是非不了身前後持此語問烏有 青山幸自重重秀問新來蕭蕭木落可堪秋否總被西風都瘦損依舊千巖萬岫把萬事無言搔首翁比渠儂人誰好是我常與我周旋久寧作我一杯酒

前調

和徐斯遠下第

辛棄疾

逸氣軒昂字似王良輕車熟路驂騑欲舞我覺君非池中物咫尺蛟龍雲雨時與命猶須天賦蘭佩芳菲無人

問歎靈均欲向重華訴空鬱鬱共誰語 兒曹不料揚
雄賦怪當年甘泉誤說青蔥玉樹風引船回滄溟闊目
斷三山伊阻但笑指吾廬何許門外蒼官三百輩盡堂
堂八尺鬚髯古誰載我帶湖去

前調

游次公

斗柄回秋律素蟾飛冰霜萬里滿川金碧得月偏多何
處是惟有橋東第一正野迴西風寒寂丹桂婆娑疎影
在想微瑕未累千金壁河漢遠澹無跡 知君有句酬

佳夕儘高歌胡牀自倚露溥珠溢坐到參橫星欲闇隱
隱天低似笠但絡緯悲啼催織吟詠淒涼翻有恨諒知
音又遠空追憶誰為置鄭莊驛

前調

游次公

暖靄浮晴籀鎖垂楊籠池罩閣萬絲千縷池上曉光分
宿霧日近羣芳易吐尋並蒂闌干凝竚不信釵頭飛鳳
去但寶刀被妾還留住天一笑萬花妒阿嬌正好金
屋貯正西風易得蕭疎扇驚塵土一自昭陽扃玉戶牆

角土花無數況多病堪傷幽素別院時聞簫鼓奏望紅
雲冉冉知何處天尺五去無路

前調

中秋

京鏜

試與嫦娥語問因何年年此夜月明如許萬頃鎔成銀
世界是處玉壺風露又豈比尋常三五變化乾坤同一
色覺星躔斗柄皆回互須教我共分付平生腳蹋紅
塵處漫紛紛雞蟲厚薄燕鴻來去只有嬋娟多情在依
舊當時雅素空自歎歸心難住留取清光岷江畔照扁

舟送我章江路頻引滿莫匆遽

前調

袁去華

曉色明窻綺耿殘燈寒生翠幙烏啼人起一夜西園新
雨過細草閒花似洗漾闌影柳塘春水閒畫雙飛歸來
燕正東風漫漫吹桃李還是箇悶天氣 回廊小院簾
垂地想連天芳草萋迷短長亭際愁到春來依然在舊
事渾如夢裏又生怕人驚憔悴樓上人家吹長笛向曲
中說盡相思意三弄處寸心碎

前調 鬱孤臺

劉克莊

絕頂規危榭，跨高寒、烏飛不過雲生。其下斤斲無聲人，
按堵翕忽青紅變化。覽城郭山川如畫，閣老鳳樓修造。
手笑譚間突出，凌雲厦臺上，景買無價。唾壺塵尾登
臨暇，似當年、文章太守歐陽公也。傾倒贛江，供硯滴判
斷雪天月夜。更喚取、鄒枚司馬，銅雀凌歊歌舞罷。訪殘
甌斷甃，無存者，餘翰墨被風雅。

前調 芍藥

劉克莊

一夢揚州事畫堂深金瓶萬朶元戎高會座上祥雲層
層起不減洛中姚魏歎別後關山迢遞國色天香何處
在想東風猶憶狂書記驚歲月一彈指數枝清曉煩
馳騎向小牕依稀重見蕪城佳麗料得花憐儂消瘦儂
亦憐花憔悴漫悵望竹西歌吹老矣應無騎鶴日但春
衫點點當時淚那更有舊情味

前調

端午

劉克莊

深院榴花吐畫簾開綵衣紈扇午風清暑兒女紛紛新

結束時樣釵符艾虎早已有遊人觀渡老大逢場慵作
戲任白頭年少爭旗鼓溪雨急浪花舞靈均標致高
如許憶生平旣紉蘭佩又懷椒醑誰信騷魂千載後波
底垂涎角黍又說是蛟饒龍怒把似而今醒到了料當
年醉死差無苦聊一笑弔今古

前調

九日

劉克莊

湛湛長空墨更那堪斜風細雨亂山如織老眼平生空
四海賴有高樓百尺看浩蕩千崖秋色白髮書生神州

淚儘淒涼不向牛山滴
追往事去無跡
少時自負凌雲筆
到如今春華落盡滿懷蕭瑟
常恨世人新意少
愛說南朝狂客
把破帽年年拈出
若對黃花辜負酒怕黃花也笑人岑寂
鴻北去日西匿

前調

遊水東
周圍

劉克莊

溪上收殘雨
倚危闌薄繡乍脫
日陰亭午
鬧市不知春色處
散在荒園廢墅
漸小白長紅無數
客子雖非河陽令也
隨緣暫作鶯花主
那可負杯中醕
碧雲四合千

巖暮恨匆匆余方有事子姑歸去趁取羣芳未搖落暇
日提魚就煮歎激電光陰如許回首明年何處在問桃
花尚記劉郎否公莫笑醉中語

前調

郡會聞妓
歌有感

劉克莊

妾出於微賤少年時朱絃彈絕玉笙吹徧麝識詩家關
雎亂羞學流鶯百轉總不涉閨情春怨誰向西鄰公子
說要珠鞍迎入梨花院身未動意先嬾
主家十二樓
連苑那人人靚妝按曲繡簾初卷道是華堂簫管唱笑

殺街坊拍袂回首望侯門天遠我有平生離驚操頗哀
而不愠微而婉聊一奏更三歎

前調

端午

劉克莊

思遠樓前路望平堤十里湖光畫船無數綠葢盈盈紅
粉面葉底荷花解語鬪巧結同心雙縷尚有經年離別
恨一絲絲總是相思處相見也又重午清江舊事傳
荆楚歎人情千載如新尚沉菰黍且盡尊前今日醉誰
肯獨醒弔古泛幾盞菖蒲綠醑兩兩龍舟爭競渡奈珠

簾幕卷西山雨看未足怎歸去

前調

劉克莊

動地東風起畫橋西繞溪桑柘漫山桃李寂寂牆陰蒼苔路猶印前回屐齒驚歲月飈馳雲駛太息攀翻長亭樹是先生手種今如此君不樂欲何俟 傍人錯會淵明意笑斯翁皇皇汲汲登山臨水佳處徑呼籃輿去歸柴桑栗里從我者門生兒子嘗試平章先賢傳屈原醒不似劉伶醉判醕酖臥花底

前調

送趙伯泳侍
郎守溫陵

王邁

憶昔同時召正青山親提玉尺量材廊廟當日班行比
元祐北玉西珠照耀一轉首宮商移調君自烏臺登騎
省覺精神風采增佳峭數賢者一不肖酒酣耳熱惟
長嘯便翩翩輟班荷橐一麾閩嶠堪笑狂生無用處垂
老雲岍月釣這富貴非由人要疇昔評君如玉雪好脩
然琴鶴風塵表清獻後又有趙

前調

守邵武
宴同官

王邁

此是河清宴覺朝來薰風滿入生綃團扇太守愁眉才
一展且喜街頭米賤也莫管官租難辦遶砌苔錢無限
數更蓮池雨過珠零亂儘買得凌波面家山樂事真
堪羨記年時荔支新熟荷筒齊勸底事來尋蕉鹿夢羸
得乾忙似箭笑富貴多如郵傳做了豐年還百姓便尊
鱸歸興催張翰看卿等上霄漢

前調

呈劉後村

王邁

出了羅浮洞有多情梅花雪片殷勤相送見說脩然琴

鶴外詩壓牛腰較重又管甚羣兒嘲弄嶺海三年持翠
節料無時不作家山夢馳玉勒歸金鳳一門朱紫環
昆仲看階庭森森蘭玉慈顏歡動宰相時來須著做且
舞萊衣傳奉却不信大材難用時事煩多人物少便中
興誰辦浯溪頌更大厦要梁棟

前調

于國寶

夢裏驂黃鶴覺三山依然不遠海風吹落浮到五湖煙
水上剛被梅花醉著粲玉樹輕明疎薄千萬瓊琚天女

隊捧冰壺玉液琉璃杓來伴我薦清酌
恍然夢斷殊非昨問溪邊竹外新來為誰開却無限冰魂招不得擬
把離騷喚覺待抖擻紅塵雙脚萬里瑤臺終一到想玉
奴不負東風約留此恨寄殘角

前調

張 鎰

看了梅花去要東風攀翻看雪與君同賦海內從來天
際遠一笑平窺萬古待翦盡燭花紅吐久矣南湖無此
客似喬松萬丈凌霄舉飛咳唾埽塵土 承平氣象森

睂宇想天家駭鸞洞裏細煙凝霧我亦秦關歸未得誰
念干將醉撫判良夜倚橫冠屢莫歎瀟湘居尚遠擁戎
輶萬騎鳴笳鼓雲正鎖汴京路

前調

江題吳

劉儼

重喚松江渡歎垂虹亭下銷磨幾番今古依舊四橋風
景在為問坡仙甚處但遺愛沙邊鷗鷺天水相連蒼茫
外更碧雲去盡山無數潮正落日還暮十年到此長
凝竚恨無人與共秋風鱸絲蓴縷小轉朱絃彈九奏擬

致湘妃伴侶俄皓月飛來煙渚恍若乘槎河漢上怕客
星犯斗蛟龍怒歌歎乃過江去

前調

洪守席上
詠牡丹

劉儼

翠蓋籠嬌面記當年沉香亭北醉中曾見見了風流傾
國豔紅紫紛紛過眼算好處何嫌春晚誰把天香和曉
露倩東風特地勻芳臉千萬朵一時偏 隔花聽取提
壺勸道此花過了春歸蝶愁鶯怨挽住東君須醉倒花
底不妨留戀待喚取笙歌一片最愛就中紅一朶似狀

元得意春風殿還惹起少年恨

前調

壽王
簡卿

劉儼

小隊停鉦鼓向沙邊柳下維舟慶公初度平盡羣蠻方
易鎮此事多應有數奈自古功成人妒君看樂羊中山
役任謗書盈篋終無據千載下竟誰與詩中帶得西
山雨指天台鴈蕩歸與壽鄉深處緩急朝廷須公出更
作中流砥柱笑癡騃紛紛兒女多少人間不平事有皇
天老眼能區處揮玉笋聽金縷

前調

贈建康鄭玉脫籍

劉儼

鄭玉非娼女歎塵緣未了飄零被春留住腸斷胭脂坡
下路成甚心情意緒生怕入梨園歌舞寂寞陽臺雲雨
散算人間誰是吹簫侶空買斷兩眉聚新來鏡裏驚
如許暗傷懷鶯老花殘幾番春暮事逐孤鴻都已往日
落千山杜宇念脩竹天寒何處不念瑣牕并繡戶妾從
前命薄甘荆布誰為作解條主

前調

壽李端明

程秘

袖手雲溪畔看人間饑烏腐鼠觸螭交戰便得金魚垂
玉帶多少雌黃點勘算此語必非河漢直自彈冠班八
座更青春數到期頤算一段玉無瑕玷公難學處尤
堪羨似泠泠秋水澄泓體清形健出處從來高一著那
肯隨人腳轉要須是乾坤清晏天意未教公猛去要都
俞了却從公便歌壽聿珠簾捲

前調

石城
弔古

王千秋

弔古城頭去正高秋霜晴木落路通洲渚欲問紫駟分

鼎事只有荒祠煙宇正現去久無簫鼓霸業荒涼遺堞
墜但蒼煙日閑征颿渡興與廢幾今古 夕陽細草空
凝竚試追思當時子敬用心良誤要約劉郎銅雀醉底
事遽爭荆楚遂但見蜀吳烽舉致使五官伸脚睡喚諸
兒畫取長陵土遺此恨欲誰語

前調

懷辛
幼安

陳亮

話殺渾閒說不成教齊民也解為伊爲葛尊酒相逢成
二老却憶去年風雪新著了幾莖華髮百世尋人猶接

踈歎只今兩地三人月寫舊恨向瑤瑟
男兒何用傷離別況古來幾番際會風從雲合千里情親長晤對妙
體本心次骨臥百尺高樓斗絕天下適安耕且老看買
犂賣劍平家鐵壯士淚肺肝裂

前調

劉過

彈鋏西來路記匆匆經行數日幾番風雨夢裏尋秋秋
不見秋在平蕪遠渚想鴈信家山何處萬里西風吹客
鬢把菱花自笑人憔悴留不住少年去男兒事業無

憑據記當年擊筑悲歌酒酣箕踞腰下光芒三尺劍時
解挑燈夜語更忍對燈花彈淚喚起杜陵風雨手寫江
東渭北相思句歌此恨慰羈旅

前調

贈鄉人
朱唐卿

劉過

多病劉郎瘦最傷心天寒歲晚客他鄉久大舸翩翩何
許至元是高陽舊友便一笑相歡攜手與問武昌城下
月又何如揚子江頭柳追往事兩着皺 燭花自翦明
如晝喚青娥小紅樓上殷勤勸酒昵昵琵琶恩怨語春

簾輕籠翠袖看舞徹金釵微溜若見故鄉吾父老道長
安市上強如舊重會面幾時又

前調

贈張
孝功

劉過

曉印霜花步夢半醒扶上雕鞍馬嘶人去嵐濕青絲雙
轡冷暖控野梅江路聽畫角吹殘更鼓悲壯寒聲撩客
恨甚貂裘重擁愁無數霜月白照離緒 青樓回首家
何處早山遙水闊天低斷腸煙樹誰念天涯牢落況輕
負暖煙濃雨記酒醒香銷時語客裏歸驕須早發怕天

寒風急相思苦應看我翠眉聚

前調

西湖

劉過

睡覺啼鶯曉醉西湖兩峰日日買花簪帽去盡酒徒無人問惟有玉山自倒任拍手兒童大笑一舸乘風翩然去避魚龍不見波聲峭歌韻遠喚蘓小神仙路遠蓬萊島紫雲深參差禁樹有煙花遶人世紅塵西嶂日百計不如歸好付樂事與他年少費盡柳金梨雪句問沉香亭北何時召心未慙鬢先老

前調

劉過

院宇重重掩醉沉沉亭陰轉午繡簾高捲金鴨香濃噴
寶篆驚起雕梁語燕正架上荼蘼開徧嫩萼梢頭舒素
臉似月娥初試宮妝淺風力嫩異香軟佳人無意拈
鍼線遶朱闌六曲徘徊為他留戀試把芳心輕輕數暗
計歸期近遠奈數了依然重怨把酒問春春不管枉教
人只恁空腸斷腸斷處怎消遣

前調

賦贈
老娼

劉過

老去相如倦向文君說似而今怎生消遣衣袂京塵曾
染處空有香紅尚軟料彼此魂消腸斷一枕新涼眠客
舍聽梧桐疎雨秋風顫燈暈冷記初見樓低不放珠
簾捲晚妝殘翠蛾狼藉淚痕流臉人道愁來須殢酒無
奈愁深酒淺但託意焦琴紈扇莫鼓琵琶江上曲怕荻
花楓葉俱淒怨雲萬疊寸心遠

前調

楊炎

十日狂風雨埽園林紅香萬點送春歸去獨有荼蘼開

未到留得一分春住早楊柳趁晴飛絮可奈暖埃欺書
永試薄羅衫子輕如霧驚舊恨到睂宇東風臺榭知
何處問燕鶯如今尚有春光幾許可煞一年遊賞倦放
得無情露滑為喚取扇歌裙舞乞得風光還兩眼待為
君滿把金杯舉扶醉玉伴揮塵

前調

別偶
可久

張輯

笛喚春風起向湖邊臘前折柳問君何意孤負梅花立
晴晝一舸淒涼雪底但小閣琴棋而已佳客清朝留不

住為匡廬只在家牕裏湓浦去兩程耳 草堂舊日談
經地更從容南山北水庾樓重倚萬卷心胸幾今古牛
斗多年紫氣正江上風寒如此且趁霜天鱸魚好把貂
裘換酒長安市明夜去月千里

前調

次岳總
幹韻

黃機

擊碎珊瑚樹為留春怕春欲去駛如風雨春不留兮君
休問付與流鶯自語但莫賦綠波南浦世上功名花梢
露政何如一笑翻金縷繫白日莫教暮 蒼頭引馬城

西路趁池亭荻芽尚短梅心未苦
小雨欲晴晴不定漠漠雲飛輕絮
算行樂春來幾度鞭影不搖鞍小
據過橫塘試把前山數雙白鷺忽飛去


前調

次徐斯遠韻寄稼軒

黃機

興廢元同宇喚君來浮君大白為君起舞
灑滿斑斑功名淚百歲風吹急雨愁與恨憑誰分付
醉裏狂歌空漫觸且休歌只倩琵琶訴人不語絃自語
詩成更倩君同賦渺樓頭煙迷碧草雲連芳樹草樹那能知人意悵

望闕河夢阻有心事
牋天天許繡帽輕裘
真男子政何須紙上
分今古未辨得賦歸去



仰選歷代詩餘卷九十四